

DIZRA' NEDXU BZUAJ SAN PABLO CHEE TIMOTEO

Pablo dxugape' diuzre Timoteo

¹ Neda', Pablo, naca' gubáz chee Jesucristo lawe' da caní bdxixruj bea Dios, Xra Xránadxu Jesucristo, weselá cheedxu, Bénnea' dxebeza lázredxu xelá'tee'.

² Dxuzúaja' da nigá chiu' lue', Timoteo, nacu' ca zrí'inequeza' lawe' da dxeajlí lazru' Cristo. Dxenaba' Xradxu Dios, ne Xránadxu Jesucristo gunē' chiu' da chawe', ne xexache lazre' lue', ne gunne' lue' xel-la dxebeza zri lazre'.

Pablo dxusízrene' Timoteo ca naca chee benne' ca' dxulusédene' da wen lazre'

³ Ca ba guta' xúeda' lue' gate na' bezá'a naga zu', ne bexá'a naga nababa xezr la xu Macedonia, begá'ana lu xezre Efeso chee nne xúenu' benne' ca' zaj zre'e na' québedxa xulusédene' da wen lazre',

⁴ ne québedxa xululapa ne'e dizra' dxuluzaze benne' ca' ca zaj naca zánete xra xrtawe' ca'. Dizra' caní dxulutil-la na bénneache. Quebe naca na da xelácale na bénneache chee xelezé chache' ca dx-eleajlí lazre' Dios. Caní dxenné xúeda' lue' xecha lasa.

⁵ Dxenné xúeda' lue' gunu' caní chee xelezrí'i ljwezre' dute lázrdawe', chee quebe bi sua da gagu na zria lázrdawe' ca', ne gaca du lazre' ca dxeleajlí lazre' Cristo.

⁶ Bal-la benne' ca' belexecuase' lu da caní, na' ba zaj nazi'e dizra' xálaze.

⁷ Dxelaca lazre' xuluxuzájle'e da nadxixruj bea Dios, ne quebe dxeléajni'ine' da dxuluchálajqueze', ne ca naca da ca' dxuluxrén lazre'.

⁸ NezdXu da nadxixruj bea na naca na xrlátaje che nu benne' dxuchínene' na ca naca chee na.

⁹ Dxal-la' gusá lázredxu quebe bzua Dios da nadxixruj bea na chee nna be'e na benne' xrlátaje ca', san chee nna be'e na benne' ca' dxelune' da calela, ne benne' ca' quebe dxuluzúe' xrtizre'e, ne benne' ca' dxelune' da zrinnaj, ne benne' wen dul-la ca', ne benne' ca' quebe dxelape' Dios ba lá'ana, ne quebe dxelapa ba lá'ana da naca chee Dios, ne benne' ca' dxelute xra xrna', ne benne' ca' dxeluti'e benne',

¹⁰ ne benne' ca' dxelune' da sban, ne benne' biu ca', benne' dxulugune' ljwezre biue' ca nu'ula, ne benne' dxelebane' benne' ca' chee xeluti'e le' lu na' benne' xula, ne benne' ca' dxelún lazre', ne benne' ca' dxelexechebe' da wen lazre', ne benne' ca' dxuluchuqe' da li.

¹¹ Caní naca da dxulé'e dizra' chawe' da bsebaga Dios neda'. Naque' Dios xabáa, Benne' szrente.

Pablo dxé'e Dios: Xcalenu'

¹² Dxapa' Xránadxu Jesucristo: Xcalenu'. Naque' Bénnea' benne' neda' xel-la waca chee guna' da nigá, lawe' da dxelé'ene' neda' xlátaje, na' nuzúe' neda' lu zrin chee'.

¹³ Xúgute da caní ba bene' chia' lácala gunnía' schanni' chee Cristo gate nate, ne gudáu zi' xuzra'

bi chee' ca', ne ben la' chee benne' ca'. Dios bexache lazre' neda' lawe' da quebe ne cheajlí lazra' Cristo, ne quebe guxéajni'ida' da na' bēna'.

14 Chee le na' Xránadxu, dutē lu xel-la zri'i lazre' zren chee' bnite lawe' chia', ne benne' neda' xel-la dxeajlí lazre', ne xel-la zri'i lazre' da nápadxu lawe' da nácadxu bi chee Jesucristo.

15 Da nigá naca na da li, na' xúgute bēneache dxal-la' xeléajle'e chee na. Caní dxenná na: Jesucristo ble'e lu xezr la xu nigá chee guselé' benne' dul-la ca', na' neda' nácadxa' benne' dul-la ca xúgute benne' ca'.

16 Chee le na' Dios bexache lazre' neda' chee gulé'e Cristo ca szren naca xel-la zren lazre' chee' nen neda', nácale'a benne' dul-la, chee gaca' neda' tu da gulé'e na lau xúgute benne' ca' xeleajlí lazre' Cristo, na' xelape' xel-la nabán chadía chacanna.

17 Chee le na' dxal-la' gápadxu ba lá'ana, ne güe lá'anadxu Bēnea' nna béaqueze' chadía chacanna. ¡Cabata' gatiē', ne quebe gaca lé'edxu Le', ne naque' Dios tu licha', ne sina! ¡Gaca ba Le' chadía chacanna! ¡Ca'an gaca na!

18 Lue', bi chia', Timoteo, dxusebaga' lue' su' wedil-la chee tíl-lalenu' da naca chee da calela, ca da buluchalaj nédxute benne' ca', benne' gulenné' waláz chee Dios ca dxal-la' gunu' lue'.

19 Bexru tipa xel-la dxeajlí lazre' chiu', chee quebe bi sua da gulale na lu xichaj lazrda'u. Bal-la benne' ca' quebe belune' caní, na' buluzúe' chalá'ala xel-la dxeajlí lazre' chee'.

20 Caní guca chee Himeneo, ne chee Alejandro, benne' ca' bdea' neda' lu na' Satanás chee xulusédie' quebe xelenné' schanni' chee Dios.

2

Ca dxal-la' guchálajlędxu Dios

¹ Da dxundxa na ba xen dxenné xúeda' lue', dxal-la' nábale lau Dios gácalęne' bėnneache, ne guchálajlele Dios, ne gucá'ana szrenle Le', ne nábale Dios gunne' le'e da dxexázrjele, ne xele Dios: Xcalenu'. Dخال-la' gunle caní, guchálajlele Dios da naca na cheę xúgute bėnneache.

² Cá'anqueze dxal-la' nábale Le' gácalęne' benne' xichje ca', benne' dxelenná be'ene' bėnneache, ne benne' xu'u lawe' ca' cheę chadxu chawe', ne súadxu lu xel-la dxebeza zri lazre', ne guzúa cuínadxu lu na' Dios du lázredxu, ne gápadxu ba lá'ana bėnneache.

³ Da nigá naca na xrlátaje, ne da dzezaca ba lazre' Dios, weselá cheędxu,

⁴ lawe' da dxaca lazre' Le' xeledá xúgute bėnneache, ne xelúnbe'e da li.

⁵ Zua tuze Dios, ne zua tuze wenaba cheę bėnneache lau Dios, Bėnnea' naque' Jesucristo, ne cá'anqueze bęn cuine' bėnneache.

⁶ Jesucristo bzua cuine' lu xel-la gute cheę bexá'awe' xúgute bėnneache, na' blé'ene' da na' ca bzrin zra cheę na.

⁷ Cheę le na' bzue' neda' gubáz cheę' cheę cu'a lban, ne gulé'eda' benne' ca' quebe zaj naque' judío dxal-la' xeleajlí lazre' Cristo, ne xelune' ca naca da li. Lau Cristo dxexecheba', ne quebe dxun lazra'.

⁸ Cheę le na' dxaca lazra' xuluchálajle xúgute bėnneache Dios gáteteze na', ne xelechisa ne'e dute xel-la li lazre' cheę' lau Dios, ne quebe xelezre'e ljwezre', ne quebe xeledíl-lalęne' ljwezre' ca'.

⁹ Nu'ula ca' dxal-la' xelácue' da naca xlátaje, ne ca naca chee da dxelúe lechítaje cuine' dxal-la' gaca na xel-la dxexruj lazre', ne xel-la du lazre', ne quegá ca dxulupá'a xíchaje', ne quegá lechítaje da naca na oro, ne quegá bga ca', ne quegá zra lane' da zácale'e na.

¹⁰ Dخال-la' xelune' da gácale na bénneache, ca dxal-la' xelún nu'ula ca' ba zaj nuzúa cuine' lu na' Dios.

¹¹ Nu'ula ca' dutę lu xel-la dxexruj lazre' chee' dxal-la' xuluzé nague' gate nu dxusede xrtizra Dios, ne quebe xelenné' chee na.

¹² Quebe dxunna' lataj nu'ula gusédene' benne' biu ca', ne quebe nna be'ene' le', san dxal-la' sue' zrize.

¹³ Caní naca na lawe' da ben Dios teca Adán, na' gudé na' bene' Eva, nu'ula chee Adán na'.

¹⁴ Adán, quebe guzí xę da xriwe' le', san guzí xę na Eva, nu'ula na', na' gudé guzí xę na le', na' bene' dul-la.

¹⁵ Tu nu'ula gape' xel-la weselá che dxezane' bidu ca', ne cheajlí lazre' Dios, ne nazri'ine' Le', ne nuzúa cuine' lu na' Dios, ne gaque' dxexruj lazre'.

3

Ca dxal-la' xelaca benne' ca' dxulusédene' bi ca' chee Cristo

¹ Da líqueze naca da nigá: Che nu benne' dxezá lazre' gaque' benne' gusédene' bi ca' chee Cristo, tu zrin xrlátaje dxaca lazre' gune'.

² Tu benne' dxusédene' bi ca' chee Cristo: Dخال-la' gaque' benne' quebe bi zua da dxunite na le'.

Dxal-la' súaḷeṅe' tuze nu'ula.

Dxal-la' gaque' benne' dxuzéajni'i cuine',

ne benne' dxenná be'e cuine',

ne benne' nape' ba lá'ana.

Dxal-la' si' lu ne'e benne' xelezrine' lizre'.

Dxal-la' gaque' benne' dxaca dxusédenē'
bénneache.

³ Quebe dxal-la' xé'aje' da guzuzre na le',

ne quebe gutil-le' nu benne',

ne quebe sa lazre' dumí.

Dxal-la' gaque' benne' dxexruj lazre', ne zren
lazre'.

⁴ Dxal-la' nézene' nna be'ene' benne' zaj zre'e lizre',

ne gulé'ene' zrí'ine' ca' xelácabe' wezúa dizra',

ne xelápabe' ba lá'ana xra xrnabe'.

⁵ Che nu benne' quebe nézene' ájala nna be'ene'

benne' zaj zre'e lizre', ¿ájazra gune' gusédenē' bi ca'
chee Dios?

⁶ Benne' dxusédenē' bi ca' chee Cristo quebe dxal-

la' gaque' benne' za dxúnbeatē dizra' chee Cristo,

chee quebe gucá'ana szren cuine', chee quebe cuía

xi'e ca guzría xi' da xriwe'.

⁷ Cá'anqueze dxal-la' gaque' benne' nape' ba lá'ana

lávela benne' quebe zaj naque' chee Cristo, chee

quebe gata' lataj nu guzúa le' chalá'ala, na' chee

quebe chu'e lu na' da xriwe'.

*Ca dxal-la' xelaca benne' dxelácalēne' bi ca' chee
Cristo*

⁸ Cá'anqueze benne' ca' dxelácalēne' bi ca' chee

Cristo:

Dxal-la' xelaque' benne' zaj nape' ba lá'ana, ne

benne' li lazre'.

Quebe dxal-la' xelé'aje' da guzuzre na le',

ne quebe xelaque' benne' dxulucudee'.

⁹ Dخال-la' xelapa xánnie' da zácale'e chee da dxeajlí
lázredxu,
ne quebe bi sua da gagu na zría chee' lu xichaj
lázrdawe'.

¹⁰ Dخال-la' guxúe xánnele ca dxeledé'.

Te na', che quebe bi zua da dxagu na zria chee',
waca xelácalene' bi ca' chee Cristo.

¹¹ Zru'ula benne' caní:

Dخال-la' xelaque' benne' zaj nape' ba lá'ana,

ne quebe xelaque' wetupa dizra' bizruj.

Dخال-la' xelaque' du lazre', ne li lazre' ca naca
xúgute da dxelune'.

¹² Tu benne' dxácalene' bi ca' chee Cristo dxal-la'
súalene' tuze nu'ula, ne dxal-la' nézene' nna be'ene'
zrí'ine' ca', ne benne' zaj zre'e lizre'.

¹³ Benne' ca' dxelácalene' bi ca' chee Cristo, che
dxelune' cháwedau' zrin chee', welezrué'ene' xel-la
ba lá'ana, na' xelezéquedxene' xuluchálaje' du lazre'
ca dxeajlí lázredxu Jesucristo.

Tu da ble'e Dios dxi'u ca naca da zéajlëdxu

¹⁴ Dxebeza lazra' xídazequeza' xedajnná'a lue',
na' dxuzúaja' chiu' da nigá

¹⁵ chee chéajni'inu' che dxezreda', ca dxal-la'
gunu' ládujla benne' ca' zaj nababe' chee Dios,
benne' ca' ba bláwizra Dios ban, ne zaj nuxru
chache' da li, ne dxuluxúe xánnie' na.

¹⁶ Da li tu da zrentë naca da nigá ble'e Dios dxi'u
ca naca da zéajlëdxu:

Dios ble'e nigá, ne guque' bënneache.

Be' Lá'azxa blé'ene' naque' xlátaje.

Belelé'e gubáz chee xabáa ca' Le'.

Benne' dutë xezr la xu belenne' ca naca chee'.

Guleajlí lazre' benne' zaj zre'e dute xezr la xu nigá
 Le'.
 Dios bezi'e Le' xabáa.

4

*Ca naca chee benne' ca' dxuluzúe' chalá'ala xel-la
 dxeajlí lazre' chee'*

¹ Be' Lá'azxa ba bdxixruj lie' wazrín zra xulúsán bal-la benne' xel-la dxeajlí lazre' chee', na' chjácalene' be' ca' xelezí xē na le', ne xelezí'e ca da xululé'e be' xriwe' ca'.

² Xuluzé nague' ca da xulusede benne' wen lazre' ca', benne' dxelún láweze da xrlátaje, ne québedxa zaj zua xel-la dxeléquebe'e xichaj lázrdawe', ne zaj naque' lázrdau zizraj, na' quebe zaj nape' xel-la stu' gate dxelún lazre'.

³ Benne' caní quebe dxelu'e latja nu guchaga na', ne cá'anqueze nu xe'aj gagu bal-la da dxágudxu, lácala ben Dios da ca' chee xelagu benne' ca' dxeleajlí lazre' Le', ne benne' ca' zaj núnbe'e da li, ne xelé'e Le'; Xcalenu'.

⁴ Xúgute da ben Dios naca na chawe', ne quebe dxal-la' bi guzúadxu chalá'ala, san dxal-la' sidxu na, ne xedxu Dios; Xcalenu',

⁵ lawe' da naca chawe' lau Dios bíteteze da dxágudxu che dxundxu ca dxenná xrtizre', ne che nábadxu Le' gunē gaca na da chawe'.

Benne' wen zrin xrlátaje chee Jesucristo

⁶ Che dxusédenu' bi bíchedxu ca' da caní, nacu' bi wen zrin chawe' chee Jesucristo, na' nazí lu na'u dizra' chee Dios, ne ca naca da dxusédedxu, da na' zéajlenu'.

⁷ Quebe gulapa na'u da dxuluzaze b́enneache, ne dizra' xálaze. Bzazraj cuinu' lu da naca chee Dios.

⁸ Che dxuzazraj cuinu' ca naca lu bel-la' dxen chiu' wácalequeze na lue' late', san che dxuzazraj cuinu' lu da naca chee Dios, wácale na lue' lu xúgute da dxunu', na' naca na da sidxu ba neza lu xezr la xu nigá, ne cá'anqueze lu xezr la xu da za za'.

⁹ Da li naca da nigá, na' xúgute b́enneache dxal-la' xeléajle'e chee na.

¹⁰ Chee le na' dxudé xel-la zi' cuínadxu dxundxu zrin lawe' da dxebeza lázredxu Dios ban, B́ennea' naque' weselá chee xúgute b́enneache, na' dxuselé' benne' ca' dxeajlí lazre' Le'.

¹¹ Da caní dxal-la' gusédenu' b́enneache, ne nne xuenu' le' xelune' na.

¹² Quebe gu'u lataj nu guzúa lue' chalá'ala lawe' da nacu' benne' cuide', san dxal-la' gacu' tu da gulé'e na benne' ca' dxeleajlí lazre' Cristo ca dxal-la' xelune'. Gulé'e na le':

Ne chee da dxuchálaju',

ne ne chee da dxunu',

ne ca nazri'inu' le sa' ljwezru',

ne ca naca Be' Lá'azxa zúalene' lue',

ne ca dxeajlí lazru' Cristo,

ne ca nacu' du lazre'.

¹³ Dxácate xida' neda', ben zi' lazru' gulabu' xi-che lá'azxa lówela b́enneache, ne gutipu' lazre' bi bíchedxu ca', ne guzéajni'inu' le'.

¹⁴ Quebe gusanu' xel-la waca da b́enna Dios lue' gate buluzé na' benne' gula ca' xichju', ne gu-lenné' ca da ble'e Be' Lá'azxa le' ca naca zrin chee Xránadxu da dxal-la' gunu'.

15 Ben da caní du lazru' chee xelelé'e xúgute bénneache nápaquezu' da naca chee Dios.

16 Bxue xanne' cuinu', ne ca da dxusédenu', ne guzé chacha lu zrin chiu'. Che gunu' da caní, na' guseláqueze cuinu', ne guseláquezu' benne' ca' xelenne' da guchálaju'.

5

Ca dxal-la' xelaca benne' ca' dxelejli lazre' Cristo

1 Quebe cun til-lu' tu benne' gula, san bzéajni'i le' ca xráquezu'. Gúcale benne' cuide' ca' ca bi bíchequezu'.

2 Gúcale nu'ula gula ca' ca xrnáquezu'. Gúcale nu'ula cuide' ca' ca bi zánquezu', dute lu xel-la dxapa ba lá'ana chiu'.

3 Gúcale nu'ula ba nate benne' chee', nu'ula quebe nu xrtie' zradxa.

4 Che tu nu'ula ba gute benne' chee' ne zaj zra' zrí'ine', u zre sue', lebe' dxal-la' xelunbe' ca da zaj nabágabe' chee xelácalebe' benne' zaj naca xrtíaquezbe', ne xelunbe' ca da zaj nabágabe' chee xra xrnabe', lawe' da naca na xrlátaje, ne da dxezaca ba lazre' Dios.

5 Nu'ula da li québedxa nu chilá' chee' dxebeza lazre' Dios, ne dxuchálajlene' Dios te zra, ne chizrela.

6 Nu'ula caní, che dxune' ca da dxezaca ba lazre' léqueze', naque' ca benne' ba nate.

7 Bdxixruj be'e benne' ca' xelune' caní, chee quebe gun na ba xen nu til-la le'.

8 Che nu benne' quebe dxebé'e gunne xue chee benne' ca' zaj naque' tuze, ne da dxun na ba xen

che quebe dxácalene' xrtíaqueze', ba bsane' xel-la dxeajlí lazre' chee', ne nácadxé' benne' wen da zrinnaj ca tu benne' quebe ne chéajle'e chee Dios.

⁹ Lu xiche naga zria la nu'ula ca' quebe nu chilá' chee', benne' dxácalele, dxal-la' guzúajle la nu'ula caní, nu'ula na' ba gudé' ga xun iza, ne guzúa tuze benne' chee'.

¹⁰ Dخال-la' gaque' nu'ula ba bēnle'e da xrlátaje ca da caní:

Che ba bsegule' zrí'ine' ca'.

Che ba guz' lu ne'e benne' bíchedxu belezrín lizre'.

Che ba gúcalene' benne' caní dutē lu xel-la dxexruj lazre' chee'.

Che ba gúcalene' benne' dxedé' xel-la zi'.

Che bi xetú da xrlátaje ba bene'.

¹¹ Quebe guzríale lu xiche na' nu'ula caní che quebe ne xelezríe' ga xun iza lawe' da gagaze xucuasa xel-la dxelezá lazre' chee' le' lu da naca chee Cristo, na' xelaca lazre' xuluchaga ne'e xecha lasa,

¹² na' xelebague' zria lawe' da bulusane' ca da gulechebe lazre' chee Cristo.

¹³ Cá'anqueze che dxeledé' tu tu xu'u, xelaque' zrawede, ne quegaze zrawede, san cá'anqueze xelaque' wetupa dizra' bizruj, na' xuluchixre chee' lu xúgute' da xelenne', ne xelenné' da quebe dxal-la' xelenné'.

¹⁴ Chee le' na' dxaca lazra' xuluxuchaga ne'e che ne zaj naque' nu'ula cuide', ne xelezrá zrí'ine', ne xuluxúe' lizre', chee quebe xelezí lataj xelezí tizra benne' ca' dxelezre'e dxi'u.

¹⁵ Bal-la nu'ula caní ba belexecuase' chee Cristo, ne zjácálene' da xriwe'.

16 Che nu benne' dxeajlí lazre' Cristo, benne' biu, u nu'ula, che zua xrtie' naque' nu'ula ba gute benne' chee', dxal-la' gácalene' le' chee' quebe xelebaga bi ca' chee' Cristo da nigá, na' benne' caní welezeque' xelácalene' nu'ula caní québedxa nu chilá' chee'.

17 Che zaj zra' benne' gula ca' dxulusédenē' cháwedau' bí ca' chee' Cristo, dxal-la' gápale'ele benne' ca' ba lá'ana, na' dxundxa na ba xen gápale ba lá'ana benne' gula ca' dxuluchálajlequeze' le'e dizra' chee' Dios, ne dxulusédenē' le'e.

18 Lu xiche lá'azxa dxenná na: Quebe cu'ule xixruj dxu'a bezre, be dxíchujba' zrua' xtila. Cá'anqueze dxenná na: Benne' wen zrin dxal-la' si'e xrlázruje'.

19 Quebe guzé nagu' che nu gagu zria chee' tu benne' gula chee' xudau' che quebe xeledá' chupa u chunna benne' xelexechebe'.

20 Benne' ca' dxelúnqueze' dul-la, dxal-la' til-lu' benne' ca' lávela xúgute' bí ca' chee' Cristo, chee' xelezrebe xezícadxa benne' ca'.

21 Lau Dios, ne lau Xránadxu Jesucristo, ne lau gubáz blau ca' chee' xabáa chee', dxusebaga' lue' chee' gunu' da caní. Dxenné xueda' lue' quebe cueu' ca zaj naca benne', ne quebe gucha'u ca gunu' chee' tu tu benne'.

22 Quebe xexúbenu' nu la guzúateu' lu zrin chee' Cristo chee' quebe bagu' dul-la chee' benne' xula. Quebe gulapa na'u ne tu da calēla.

23 Lawe' da quebe chawe' zua le'u, ne tu lize dxaca na, québedxa xé'aju' nísaze, san güe'e late' xrise uva wal-la.

²⁴ Zaj nalá' dul-la chee bal-la benne' gate quebe nu ne guchi'a ca da zaj nune', san dul-la da zaj nun xezícadxa benne' ca' xululé'e lawe na te na'.

²⁵ Cá'anqueze zaj nalá' da xrlátaje da zaj nun bal-la benne', ne che zra da xrlátaje da quebe zaj nalá', quebe gaca tu xelegáchequeze na.

6

¹ Benne' zaj nada'u dxal-la' xelápale'e ba lá'ana xrane' ca' chee quebe nu nne schanni' chee Dios, ne chee da dxusédedxu.

² Che benne' zaj nada'u, zaj zra' xrane' ca' dxelejálí lazre' Cristo, quebe dxal-la' xuluzúe' le' chalá'ala lawe' da zaj naque' benne' biche', san dxal-la' xelune' zrin da nácadxa xrlátaje chee xrane' ca' dxelezi'e ba neza zrin na', lawe' da dxelejálí lazre' Cristo, ne zaj naque' benne' biche' zaj nazri'ine'. Bzéajni'i benne' ca' da nigá ne bsizre le'.

Da calela da dxulusede benne', ne xel-la gunní'ali

³ Che nu benne' dxusédene' da zaj naca calela da quebe zaj naca na tuze ca da bsede Xránadxu Jesucristo, ne ca da dxusede da dxéajledxu chee Dios,

⁴ benne' nigá dxucá'ana szren cuine', ne quebe bi nézene'. Dxezá lázrele'e gutil-le' benne' dizra' ca naca chee tu tu dizra' ca'. Benne' dxelún caní: Dxelaque' benne' xre lazre', ne dxeledil-le', ne dxulucháchale ljwezre', ne dxeléquene' dxun le sa' ljwezre' da calela,
⁵ ne tu lize dxulutil-la dizra' ljwezre',

ne zaj naque' benne' zaj nazrinnaj lu xichaj
lázdawe',

ne quebe zaj nunbe'e da li.

Dxeléquene' zrin dxundxu chee Cristo naca na tu da waca xuluchínene' chee xelaque' benne' gunní'a. Quebe gunu' tuze benne' caní.

⁶ Da li da zéajlędxu chee Cristo naca na tu da gunní'a zren, na' caní nácaqueze chee tuze bēneea' dxezaca ba lazre' ca da nape'.

⁷ Quebe bi núadxu gate gúlajdxu lu xezr la xu nigá, ne quebe bi xexúadxu gate xezá'adxu nigá,

⁸ san che de da gágudxu, ne zra lánadxu, dxal-la' xezaca ba lázredxu nen da ca'.

⁹ Benne' ca' dxelaca lazre' xelaque' gunní'a, cheajlechi'e lu na' da xriwe', na' cheajlechu'e lu xralaj chee le na, chee xelezá lazre' da xálaze, da dxulucá'ana ditaj na bēneache, ne dxelegú'u na bēneache lu da ba xa' naga xelebía xi'e.

¹⁰ Benne' nazri'ine' dumí dxune' xúgute da calela, na' zaj zra' bal-la benne' gulezá lazre' na, na' busane' xel-la dxeajlí lazre' chee', na' ba gulezí' lataj xel-la dxudía lu lázdawe'.

Da dxusizre Pablo Timoteo

¹¹ Lue', wen zrin chee Dios, gucuasa lu da caní. Ben da naca xlátaje, ne bzua cuinu' lu na' Dios, ne guxeajlí lazre' Cristo, ne bzri'i Le', ne guca zren lazre', ne dxexruj lazre'.

¹² Gudíl-lale da xriwe', guchínenu' xel-la dxeajlí lazre' chiu'. Bexru tipa xel-la nabán da chadía chacanna lawe' da bláwizra Dios lue' chee gapu' da nigá, na' ba blé'enu' ca dxeajlí lazru' Cristo lávela zane' benne' dxelexechebe' chee na.

13 Na'a, lau Dios, Bénnea' nuzúe' xel-la nabán chee xúgute da naca ban, ne lau Jesucristo, Bénnea' cá'anqueze blé'ene' da naque', ne bechebe' chee na lau Poncio Pilato, dxenné xueda' lue'.

14 Guzú' dizra' ca da dxapa' lue', ne quebe gucha'u na. Dخال-la' gunu' na chee quebe nu seque' bi nne' chiu' ca zrin zra xelá' Xránadxu Jesucristo.

15 Ca zrin zra chee na Dios sel-le' Le'. Naque' Dios tu licha', na' Benne' Lá'azxa dxenná be'e. Naque' Wenná bea, Benne' dxenná be'ene' wenná bea ca', ne naque' Xrana xúgute benne' zaj naque' xrana bènneache.

16 Tuze Dios quebe gatie', ne zue' lu xel-la naxaní' naga quebe nu seque' cheaj. Netú bènneache quebe ne lé'ene' Le', ne quebe nu gaca le'e Le'. Chee Le' naca xel-la ba lá'ana, ne xel-la dxenná bea chadía chacanna. ¡Ca'an gaca na!

17 Gunné xue benne' zaj naque' gunní'a lu xezr la xu nigá chee quebe xulucá'ana szren cuine', ne quebe xuluxrén lazre' xel-la gunní'a chee', lawe' da quebe naca na da chadía chacanna. Dخال-la' xuluxrén lazre' Dios ban, Bénnea' dxúnnale'e dxi'u xúgute da dxechínedxu chee sidxu da ba neza.

18 Gunné xue benne' caní xelune' da xrlátaje, ne xelaque' benne' gunní'a lu da xrlátaje da xelune', ne bi xulunézruje' benne' xache' ca', ne xulunézruje'e na.

19 Caní gaca, xelezrué'ene' xel-la gunní'a da gaca na tu da guzúa chacha na le' lu zra da za za', ne xelape' xel-la nabán da zeajlí canna.

20 Lue', Timoteo, bxue xanne da nuzúa Dios lu na'u. Quebe guzé nagu' dizra' xálaze chee xezr la

xu nigá, da na' dxeleⁿná bal-la benne' naca na xel-
la sina. Da nigá naca na da w^en lazre'.

²¹ Bal-la benne' gulezí'e na, na' bulusan^e' xel-
la dxeleajlí lazre' che^e'. Dxenábeda' Dios gun^e' da
chawe' chiu'. ¡Ca'an gaca na!

**Xela wezria cube nen salmo ca’
New Testament and Psalms in Zapotec, Tabaa
(MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Psalms

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

80626b72-93df-58ae-9f5e-9d86733fab46